

NOTA DE PRENSA

[14 de marzu del 2014]

La Banda de Gaitas El Trasno ganó con «Volviche» la octava edición del *Premiu al Meyor Cantar* (2 páxines)

- El Premiu al Meyor Cantar entámalu la Conseyería d'Educación, Cultura y Deporte pa facer visible'l talentu de los creadores musicales qu'usen la llingua asturiana o'l gallego-asturianu en composiciones que seyan dafechamente orixinales y nueves.

La Gala final del VIII Premiu al Meyor Cantar desarrollóse el pasáu viernes 14 de marzu nel Teatru de la Llaboral (Xixón), y nel so trescursu actuaron en directo los cuatro finalistes d'esti añu colos cantares que se citen darréu:

- ✓ «Volviche», de Banda de Gaitas el Trasno.
- ✓ «Ente mazanos», de Rafa Lorenzo.
- ✓ «La pena abierta», de Silvia Quesada.
- ✓ «Vivo n'algún llugar», del grupo Vrienden.

Depués d'oyer los cantares finalistes, un xuráu independiente, formáu pol periodista y locutor radiofónicu Aurelio Argel; los profesores de Música Inés Estrada y Emilio Huerta; la escritora y académica de la llingua Marta Mori; el responsable de la Oficina de Coordinación Cultura y Llingüística del Navia, Iván Iglesias; y la directora xeneral de Política Llingüística del Gobiernu d'Asturies, Ana M.^a Fueyo Llana, escoyó como meyor cantar del añu 2013 el tema «Volviche», de la Banda de Gaitas El Trasno.

La **Banda de Gaitas El Trasno** créase nel añu 1999 na Escuela de Música Tradicional del conceyu de Cuaña, y la mayoría de los sos componentes son escolinos y escolines d'esti centru, onde ponen clas los hermanos José Manuel y Javier Tejedor. El so repertoriu ta compuestu, na mayor parte, de pieces tradicionales asturianas, aunque cuenten con un bon piñu de melodíes de creación nueva. Nestos quince años

d'andadura, la banda tien actuaos per tol territoriu asturianu y en dellos festivales europeos.

Nel mes d'avientu del 2013 editaron el discu *Axeitín*, baxo la direcció musical de Javier Tejedor, y onde participaron dellos músicos de sonadía dientro de la escena folk d'Asturies, como José Manuel Tejedor, Rubén Bada, Rubén Álvarez o Israel Sánchez. Nesti discu predominen los temas instrumentales, aunque incluye tamién dos pieces cantaes: «La Capitana», del músicu xixonés Carlos Rubiera; y «Volviche», con lletra en gallego-asturianu del escritor tapiegu Xosé Miguel Suárez Fernández y que ye'l tema ganador d'esta edición del Premiu.

...